

# Powšitkowne WOZJEWJENJA

njedźelu, 6. septembra 2015

## Zapokazanje noweho Chróšćanskeho fararja

Farar Měrcin Deleńk přewza wutoru, 1. septembra, Chróšćansku a zdobom jako farski administrator Wotrowsku wosadu. Swjatočne zapokazanje fararja Deleńka budže pónđzelu, 14. septembra, w 17 hodź. na Božej mši w Chróšćanskej cyrkwi. Wšitcy su wutrobnje přeprošeni.

## Duchowna hudźba w Budyskej serbskej cyrkwi

Na kermuši cyrkwy Našeje lubeje Knjenje w Budyšinje njedźelu, 13. septembra, zaklinči we 18.00 hodź. koncert w rjedže duchowna hudźba. Jón wuhotuja huslerka Magdalena Römheld, saksofonist Thomas Siegmund a šola Katolskeho tachantskeho chóra. Nimo toho zahraje cyrkwinski hudźbny direktor Friedemann Böhme na piščelach. Wón ma zdobom cyłkowny nawod. Zastup je darmotny, při cyrkwinych durjach pak přewjedže so zběrka. Wšitcy su wutrobnje na duchownu hudźbu do Budyšina přeprošeni.

## Nyšpor z křižnej relikwiju w Klóštrje

Składnostnje Lěta Bohu poswjećeneho žiwjenja wotměje so wutoru, 15. septembra, we 18.30 hodź. w klóšterskej cyrkwi w Pančicach-Kukowje nyšpor z křižnej relikwiju klóštra Marijineje Hwězdy. Cistercienski wutrobnje na tule Božu službu přeprošuja, na kotrejž chcedža so wo duchowne powołanja modlić a za nje so dżakować.

## Patronatna Boža mša w Chróšćicach

Wobydlerjo a přistajeni Domu swjateje Ludmile w Chróšćicach woswjeća štwórtk, 17. septembra, swój lětuši patronatny swjedžeń. Swjatočna Boža mša budže w 10.00 hodź. we wosadneje cyrkwi. Přeprošamy wšitkich wěriwych wutrobnje na tute kemše. *W. Brězan*

## Projektowy dzeń k skrućenju dźěći

Wšitke dźěći wot předšulskeje staroby hač do 6. lětnika su sobotu, 19. septembra, na projektowy dzeń pod hesłom „Starkmachtag“ do Radworja přeprošene. Dalši budže 3. oktobra w Chróšćicach. Dzeń zarjadowuje dekanatne dušepastyrstwo we Worklecach zhromadnje z dušepastyrstwom dźěći Drježdžansko-Mišnjanskeho biskopstwa. Nadrobnosće zhonja zajimcy z plakata a z wupołożenych flyerow w cyrkwjach kaž tež pod [www.posol.de](http://www.posol.de). Přizjewjenja přijimuju so za zarjadowanje w Radworju hač do štwórtka, 10. septembra, za dalše w Chróšćicach hač do 24. septembra pisomnje w dekanatnym dušepastyrstwje we Worklecach, Młynski puć 4.

## „Biblija a ... ja“

Što ma biblija ze mnu činić? Njeje wona jeničce kniha, kotraž je poľna wšelakich wułożowanjow, mudrosćow a starych stawiznow? Jewja so w njej scyła moje žiwjenje, moje prašenja a dwěle, moje nadźije a žedźby? Abo: Sym sam „spisar“ swojeje „bibliskeje“ stawizny. Tutym prašenjam wěnuje so seminar „Biblija ... a ja“ wot pjatka do njedźele, 18. do 20. septembra, w Smochčanskim Domje biskopa Bena. Dalše informacije dóstanu zajimcy pod telefonowym čisłom (03 59 35) 2 23 17. Tež přizjewjenja su pod tutym čisłom móžne.

## **Putniska jězba do Mariazella**

Za putnisku jězbu do Mariazella w Awstriskej su hišće městna swobodne. Nimo Mariazella chcemy wulkotny benediktinski klóšter Melk, Narodny park Gesäuse a klóšter Admont wopytać. Předwidžane je tohorunja, zo wobhladamy sej z łódže luboznu krajinu Wachau. Přenocujemy stajnje w Mariazellu. Jězba wotměje so wot pónđzele do soboty, 12. do 17. oktobra. Přizjewić móža so zajimcy pola Šmitec w Radworju, telefonowe čisło (03 59 35) 28 60.

## **Wjacednjowska jězba za džěci 5. a 6. lětnika**

Na pućowanje po slědach swjateho Bena a na wotkrywanje dalších zajimawostkow kónčiny wokoło Mišna přeprošuje dekanatne dušepastyrstwo džěci 5. a 6. lětnika wot pónđzele do štwórtka, 12. do 15. oktobra. Za jězbu zběra so wot kóždeho wobdžělnika přinošk we wysokosći 65 eurow. Zajimcy njech so prošu hač do štwórtka, 1. oktobra, pod telefonowym čisłom (03 57 96) 8 87 07 we Worklecach přizjewja.

## **Internetowe eksercicije za žony**

Džěłowe zjednoćenstwo žónske dušepastyrstwo Bayerskeje poskićuje zajimowanym žonom, młodym kaž staršim, duchowne zwučowanja přez internet. Tute eksercicije započnu so 1. nowembra a traja 30 dnjow. Wobdžělnicy dóstanu kóždy dzeń duchowny impuls z wobrazom wuměłče Uty Bergh-Johnson na swój mobilny telefon. Wosobinski přewod je zdobom móžny, dalokož sej jón něchtó přeje. Za nazymski čas z krótkimi dnjami a dołhimi nocami je tole zawěsće rozmyslenja hódny poskitk. Dalše informacije dóstanu zajimče telefonisce pod čisłom (0 89) 21 37 22 13 abo móža so přez e-mail [agfsb@eomuc.de](mailto:agfsb@eomuc.de) naprašować. *KP*